

D.R. 41/2006

RANG UNDANG-UNDANG

bernama

Suatu Akta untuk meminda Akta Eksais 1976.

[]

DIPERBUAT oleh Parlimen Malaysia seperti yang berikut:

Tajuk ringkas dan permulaan kuat kuasa

1. (1) Akta ini bolehlah dinamakan Akta Eksais (Pindaan) 2006.

(2) Akta ini mula berkuat kuasa pada tarikh yang ditetapkan oleh Menteri melalui pemberitahuan dalam *Warta*, dan Menteri boleh menetapkan tarikh yang berlainan bagi permulaan kuat kuasa peruntukan yang berlainan dalam Akta ini.

Pindaan seksyen 2

2. Akta Eksais 1976 [*Akta 176*], yang disebut "Akta ibu" dalam Akta ini, dipinda dalam seksyen 2 —

(a) dengan memasukkan selepas takrif "eksport" takrif yang berikut:

' "ketetapan kastam" ertinya ketetapan kastam yang dibuat oleh Ketua Pengarah di bawah seksyen 5B;'; dan

(b) dengan memasukkan selepas takrif "todi" takrif yang berikut:

' "Tribunal Rayuan Kastam" ertinya Tribunal Rayuan Kastam yang ditubuhkan di bawah seksyen 141B Akta Kastam 1967 [Akta 235]:.

Bahagian IIA baru

3. Akta ibu dipinda dengan memasukkan selepas seksyen 5 Bahagian yang berikut:

"BAHAGIAN IIA

KETETAPAN KASTAM

Permohonan untuk ketetapan kastam

5A. (1) Mana-mana orang boleh memohon, di dalam borang yang ditetapkan berserta dengan fi yang ditetapkan, kepada Ketua Pengarah bagi suatu ketetapan kastam berkenaan dengan mana-mana satu atau lebih perkara yang berikut:

- (a) penjenisan barang-barang;
- (b) prinsip-prinsip yang diguna pakai bagi maksud menentukan nilai sesuatu barang; atau
- (c) apa-apa perkara lain yang ditetapkan oleh Ketua Pengarah.

(2) Permohonan di bawah subseksyen (1) boleh dibuat—

- (a) berkenaan dengan barang-barang import—
 - (i) pada bila-bila masa sebelum barang-barang itu, yang menjadi hal perkara permohonan, diimport atau dimaksudkan untuk diimport ke Malaysia; atau
 - (ii) pada bila-bila masa kemudian, jika Ketua Pengarah atas budi bicaranya membenarkan; atau

(b) berkenaan dengan barang-barang yang dikilangkan —

- (i) pada bila-bila masa sebelum barang-barang itu, yang menjadi hal perkara permohonan, dikilangkan; atau
- (ii) pada bila-bila masa kemudian, jika Ketua Pengarah atas budi bicaranya membenarkan.

(3) Pemohon boleh menarik balik permohonannya pada bila-bila masa sebelum sesuatu ketetapan kastam dibuat dan apa-apa bayaran yang dibuat yang berhubungan dengan permohonan bagi ketetapan kastam itu hendaklah dilucut hak oleh Ketua Pengarah.

Pembuatan ketetapan kastam

5B. (1) Tertakluk kepada subseksyen (3), Ketua Pengarah hendaklah membuat ketetapan kastam berkenaan dengan mana-mana perkara yang dinyatakan dalam permohonan yang dibuat di bawah seksyen 5A dan ketetapan yang sedemikian hendaklah mengikat pemohon itu.

(2) Apa-apa ketetapan kastam boleh tertakluk kepada syarat yang Ketua Pengarah sifatkannya patut dikenakan.

(3) Ketua Pengarah boleh menolak untuk membuat ketetapan kastam jika, pada pendapatnya—

- (a) maklumat yang diberi oleh pemohon tidak mencukupi untuk berbuat demikian;
- (b) permohonan itu adalah bagi suatu keadaan andaian; atau
- (c) suatu rayuan di bawah Akta ini yang melibatkan hal perkara yang dirujuk dalam permohonan itu masih belum selesai.

Pindaan, pengubahsuaian atau pembatalan ketetapan kastam

5c. (1) Sesuatu ketetapan kastam boleh dipinda, diubah suai atau dibatalkan oleh Ketua Pengarah jika—

- (a) ia mengandungi suatu kesilapan yang perlu dibetulkan;

Rang Undang-Undang

- (b) ketetapan kastam itu diasaskan kepada kesilapan fakta atau perundangan;
- (c) terdapat perubahan dalam perundangan yang berhubungan dengan eksais; atau
- (d) terdapat perubahan dalam fakta utama atau keadaan yang menjadi asas ketetapan itu.

(2) Ketua Pengarah hendaklah, sebaik sahaja selepas membuat pindaan, pengubahsuaian atau pembatalan itu, memberi notis secara bertulis kepada pemohon mengenai pindaan, pengubahsuaian atau pembatalan itu dan, tertakluk kepada subseksyen (3), ketetapan yang dipinda, diubah suai atau dibatalkan itu hendaklah mula berkuat kuasa dari tarikh yang dinyatakan dalam notis.

(3) Walau apa pun subseksyen (2), jika sesuatu ketetapan kastam mempunyai kesan menyebabkan atau menaikkan apa-apa liabiliti duti yang berkenaan dengan mana-mana barang, dan —

- (a) barang-barang itu diimport dalam tempoh tiga bulan dari tarikh notis pindaan, pengubahsuaian atau pembatalan diberi menurut suatu kontrak mengikat yang dibuat sebelum tarikh itu;
- (b) barang-barang itu telah meninggalkan tempat pengilangan atau gudang di negara yang barang-barang itu dieksport untuk dihantar terus ke Malaysia pada tarikh notis pindaan, pengubahsuaian atau pembatalan ketetapan itu diberi; atau
- (c) barang-barang itu diimport pada atau sebelum tarikh notis pindaan, pengubahsuaian atau pembatalan diberi tetapi belum dilepaskan untuk penggunaan tempatan,

maka ketetapan kastam yang telah dibuat sebelum pindaan, pengubahsuaian atau pembatalan di bawah seksyen ini hendaklah terpakai bagi barang-barang sedemikian.

(4) Walau apa pun subseksyen (2), dan tertakluk kepada seksyen 13, jika pindaan, pengubahsuaian atau pembatalan sesuatu ketetapan kastam mempunyai kesan menurunkan apa-apa liabiliti duti berkenaan dengan apa-apa barang, apa-apa cukai lebih tinggi yang telah dibayar hendaklah dikira seolah-olah ia telah dibayar dengan khilaf.

Ketua Pengarah mengisytiharkan ketetapan sebagai batal, dsb.

5D. Ketua Pengarah hendaklah melalui notis mengisytiharkan sesuatu ketetapan kastam yang dibuat di bawah seksyen 5B sebagai batal, tak sah dan tiada kesan jika ketetapan itu telah diperoleh oleh pemohon secara fraud, salah nyataan atau pemalsuan fakta.

Penerimaan dua ketetapan kastam

5E. Jika seseorang pemohon menerima dua atau lebih ketetapan kastam yang berbeza mengenai hal perkara yang sama, ketetapan yang sedemikian hendaklah disifatkan sebagai batal dan tak sah serta pemohon sedemikian hendaklah dengan serta merta memberitahu Ketua Pengarah yang hendaklah, dalam tempoh tiga puluh hari dari tarikh pemberitahuan itu, mengeluarkan suatu ketetapan kastam yang bam."

Pindaan seksyen 18A

4. Seksyen 18A Akta ibu dipinda dengan memasukkan selepas perkataan "seksyen" perkataan "5B".

Pindaan seksyen 47

5. Akta ibu dipinda dengan menggantikan seksyen 47 dengan seksyen yang berikut:

"Rayuan kepada Tribunal Rayuan Kastam

47. (1) Mana-mana orang yang terkilan dengan keputusan Ketua Pengarah boleh, kecuali dalam apa-apa perkara yang berhubungan dengan kompaun atau subseksyen 67(3), dalam tempoh tiga puluh hari dari diberitahu mengenai keputusan yang sedemikian secara bertulis, merayu kepada Tribunal Rayuan Kastam yang keputusannya adalah muktamad.

(2) Semua peruntukan yang berhubungan dengan Tribunal Rayuan Kastam hendaklah terpakai bagi Akta ini."

Pemotongan seksyen 47A

6. Akta ibu dipinda dengan memotong seksyen 47A.

Pindaan seksyen 74

7. Seksyen 74 Akta ibu dipinda—

- (a) dengan menggantikan subperenggan (1)(i) dengan subperenggan yang berikut:

"(i) dalam hal barang-barang yang dikilangkan secara tempatan —

- (A) bagi kesalahan pertama, denda tidak kurang daripada sepuluh kali amaun duti eksais dan tidak melebihi dua puluh kali amaun duti eksais, atau pemenjaraan selama tempoh tiga tahun atau kedua-duanya; dan
- (B) bagi kesalahan kedua atau yang berikutnya, denda tidak kurang daripada dua puluh kali amaun duti eksais dan tidak melebihi empat puluh kali amaun duti eksais, atau pemenjaraan selama tempoh tidak melebihi lima tahun, atau kedua-duanya:

Dengan syarat bahawa apabila tiada duti terlibat atau amaun duti tidak dapat ditentukan, penalti itu boleh merupakan denda tidak melebihi lima ratus ribu ringgit atau pemenjaraan selama tempoh tidak melebihi lima tahun atau kedua-duanya;"

- (b) menggantikan subperenggan (1)(ii) dengan subperenggan yang berikut:

"(ii) dalam hal barang-barang diimport—

- (A) bagi kesalahan pertama, didenda tidak kurang daripada sepuluh kali amaun duti eksais dan tidak melebihi dua puluh kali amaun duti eksais itu, atau pemenjaraan selama tempoh tidak melebihi tiga tahun atau kedua-duanya; dan

- (B) bagi kesalahan kedua atau yang berikutnya, denda tidak kurang daripada sepuluh kali amaun duti eksais itu dan tidak melebihi empat puluh kali amaun duti eksais, atau pemenjaraan selama tempoh tidak melebihi lima tahun, atau kedua-duanya:

Dengan syarat bahawa jika amaun duti eksais itu tidak dapat ditentukan, penalti itu boleh merupakan denda tidak melebihi lima ratus ribu ringgit atau pemenjaraan bagi suatu tempoh tidak melebihi lima tahun atau kedua-duanya."

Pindaan seksyen 85

8. Subseksyen 85(2) Akta ibu dipinda dengan memasukkan selepas perenggan (b) perenggan yang berikut:

- "(ba) mengawal selia pengendalian semua perkara yang berhubungan dengan ketetapan kastam;
- (bb) menetapkan dan mengenakan fi yang berhubungan dengan ketetapan kastam dan memperuntukkan cara pungutan dan bayaran fi yang sedemikian;
- (de) menetapkan borang yang digunakan bagi maksud ketetapan kastam;"

Kecualian dan peralihan

9. (1) Walau apa pun peruntukan seksyen 3 Akta ini, mana-mana ketetapan kastam yang dibuat oleh Ketua Pengarah sebelum berkuatkuasanya seksyen itu, adaiiah disifatkan telah dibuat di bawah seksyen itu dan sah bagi tempoh tiga tahun dari tarikh kuat kuasanya seksyen itu.

(2) Mana-mana rayuan di bawah seksyen 47 Akta ibu kepada Menteri yang dibuat sebelum tarikh ditetapkan dan masih belum selesai pada tarikh yang sedemikian hendaklah, selepas tarikh yang ditetapkan, diteruskan seolah-olah Akta ibu tidak dipinda oleh Akta ini.

(3) Mana-mana rayuan di bawah seksyen 47A Akta ibu kepada mahkamah yang dibuat sebelum tarikh ditetapkan dan masih belum selesai pada tarikh yang sedemikian hendaklah, selepas tarikh ditetapkan, diteruskan seolah-olah Akta ibu tidak dipinda oleh Akta ini.

(4) Bagi maksud subseksyen (2) dan (3), "tarikh ditetapkan" ertinya tarikh yang ditetapkan oleh Menteri di bawah subseksyen 1(2).

HURAIAN

Rang Undang-Undang ini bertujuan untuk meminda Akta Eksais 1976 ("Akta 176").

2. *Fasal 1* mengandungi tajuk ringkas dan kuasa Menteri untuk menetapkan tarikh permulaan kuat kuasa Akta yang dicadangkan.

3. *Fasal 2* bertujuan untuk meminda seksyen 2 Akta 176 bagi memasukkan takrif "ketetapan kastam" dan "Tribunal Rayuan Kastam" ke dalam seksyen itu.

4. *Fasal 3* bertujuan untuk memasukkan Bahagian baru IIA ke dalam Akta 176 bagi memperuntukkan tentang permohonan bagi ketetapan kastam, pembuatan ketetapan itu dan pemakaiannya. *Fasal* ini membenarkan Ketua Pengarah meminda, mengubah suai atau membatalkan sesuatu ketetapan kastam. Ketua Pengarah juga diberi kuasa untuk mengisytiharkan sesuatu ketetapan kastam itu sebagai batal, tak sah dan tiada kesan jika ketetapan itu diperoleh secara fraud, salah nyataan atau pemalsuan fakta. Seseorang pemohon tidak dibenarkan untuk memegang dua atau lebih ketetapan kastam bagi hal perkara yang sama.

5. *Fasal 5* bertujuan untuk meminda seksyen 47 Akta 176 bagi membolehkan mana-mana orang yang terkilan dengan keputusan Ketua Pengarah, selain keputusan yang berhubungan dengan kompaun, merayu kepada Tribunal.

6. *Fasal 7* bertujuan untuk meminda seksyen 74 Akta 176 bagi menyatakan denda minimum yang boleh dikenakan bagi kesalahan yang dilakukan di bawah seksyen itu.

7. *Fasal 8* bertujuan untuk meminda seksyen 85 Akta 176 bagi memberi kuasa kepada Menteri untuk membuat peraturan-peraturan berhubungan dengan ketetapan kastam.

8. Pindaan lain yang tidak diperkatakan secara khusus dalam Huraian ini merupakan pindaan yang kecil dan berbangkit.

IMPLIKASI KEWANGAN

Rang Undang-Undang ini akan melibatkan Kerajaan dalam perbelanjaan wang tambahan yang amaunnya belum dapat ditentukan sekarang ini.

[PN(U²)2560]